

بيعدوا أملاكي

الطين مع الصلصال
خلقة تراب الأرض
بس التراب إسود
مش لون لكن إحساس
أكحل من المقسوم
بين الحظوظ منداس
بخت ونصيب ألوان
باهته بخيط الضي
والضي يبقى الأمل
نلقى العجايب عكس
لو قلنا بيذا البرج

منوصفوش بالميل
والرقصة ع السلم
سلمها من بنور
لازم يكون شفاف
من تحتها ينعم
من فوق يزيد بهتاف
جلادها على بابها
كرباجه سوء الحظ
بتربى جوانا
الجلد تحت الجلد
ما يهمناش الجلد
نطلب نلاقي الحلم
ف الإيد بيتحقق
تتغير الأوضاع

والخيط من الأنوار
يبقى بضي الشمس
لكن ياليل أعتم
لونت لي ترابي
عجنتني ببك
سيف العلا نصله
صدى من الدمعات
لما فارقتي النور
رغم إني مش أعمى
والقلب شاف أهوال
قسوة وكلام إتقال
أسمع ولا سامع
بيعدو أملاكي
أرض السواد واخدة

تسعين من المية
وتسعة فوق الوصف
والواحد الفاضل
بيعيش أمل للنور
يرسم خيالى الشكل
أبص ف مرايتي
ألقاني مش باين
وأنا كنت فاكرني
إسود على نفسي
أتاريني من بختي
مبانش ف المرايات